

大佛頂首楞嚴經 卷五

丑四 證六根即真妄元 密令選根門圓通

- ⊙ 一 明結解無二決通次義分二
- ⊙ 一 正明結解無二分二
- ⊙ 一 疑請

阿難白佛言：『世尊！如來雖說第二義門，今觀世間解結之人，若不知其所結之元，我信是人終不能解。世尊！我及會中有學聲聞亦復如是。從無始際與諸無明俱滅俱生，雖得如是多聞善根，名為出家，猶隔日瘡。惟願大慈哀愍淪溺！今日身心。云何是結？從何名解？亦令未來苦難衆

生得免輪迴，不落三有。』作是語已，普及大眾五體投地，雨淚翹誠，佇佛如來無上開示。

㊸ 一開示分二

㊹ 一現瑞

爾時，世尊憐愍阿難及諸會中諸有學者，亦為未來一切眾生為出世因作將來眼，以闔浮檀紫金光手摩阿難頂。即時十方普佛世界六種震動，微塵如來住世界者各有寶光從其頂出，其光同時於彼世界來祇陀林，灌如來頂。是諸大眾，得未曾有。

㊺ 一正說分二

㊻ 一諸佛同宣

於是阿難及諸大眾，俱聞十方微塵如來異口同音告阿難言

：『善哉！阿難！汝欲識知俱生無明，使汝輪轉生死結根，唯汝六根，更無他物。汝復欲知無上菩提，令汝速證安樂解脫寂靜妙常，亦汝六根，更非他物。』

㊼ 一釋迦親說分二

㊽ 一疑問

阿難雖聞如是法音，心猶未明，稽首白佛：『云何令我生死輪迴，安樂妙常，同是六根更非他物？』

㊾ 一答釋分二

㊿ 一長文

佛告阿難：『根塵同源，縛脫無二，識性虛妄，猶如空華。阿難！由塵發知，因根有相；相見無性，同於交蘆。是故汝今知見立知，即無明本，知見無見，斯即涅槃無漏真

淨。云何是中更容他物？」

④二偈頌分二

④一頌說法門分二

④一重頌分二

④一頌近文顯性以為修本

爾時，世尊欲重宣此義而說偈言：

「真性：有為空，	緣生故，如幻；
無為無起滅，	不實，如空華。
言妄顯諸真，	妄真同一妄。
猶非「真非真」，	云何「見所見」？
中間無實性，	是故若交蘆。
結解同所因，	聖凡無二路。

汝觀交中性，	空有二俱非。
迷晦即無明，	發明便解脫。

④二頌前文示修以合妙性

解結因次第，	六解一亦亡。
根選擇圓通，	入流成正覺。

④一孤起頌

陀那微細識，	習氣成瀑流；
真非真恐迷，	我常不開演。
自心取自心，	非幻成幻法。
不取無非幻，	非幻尚不生；
幻法云何立？	

④一頌歎法門

是名妙蓮華，
如幻三摩提，
此阿毘達磨，
一路涅槃門。

金剛王寶覺，
彈指超無學，
十方薄伽梵，

丑五 借結巾明六解一
亡即漸解而喻修
圓通倫次

- ① 二兼顯六解一亡分三
- ② 一疑請分二
- ③ 一敘益

於是阿難及諸大眾，聞佛如來無上慈誨，祇夜伽陀雜糅精瑩，妙理清徹，心目開明，歎未曾有。

④ 二請疑

阿難合掌頂禮白佛：『我今聞佛無遮大悲，性淨妙常真實法句，心猶未達六解一亡舒結倫次。惟垂大慈，再愍斯會及與將來，施以法音洗滌沈垢！』

⑤ 二答示分二

⑥ 一結巾喻迷

即時如來於師子座，整涅槃僧，斂僧伽黎，攬七寶几，引手於几，取劫波羅天所奉華巾，於大眾前縮成一結。示阿難言：『此名何等？』

阿難大眾俱白佛言：『此名為結。』

於是如來縮疊華巾，又成一結，重問阿難：『此名何等？』

』

阿難大眾又白佛言：『此亦名結。』

如是倫次縮疊華巾，總成六結。一一結成，皆取手中所成之結持問阿難：『此名何等？』

阿難大眾亦復如是次第誦佛：『此名為結。』

佛告阿難：『我初縮巾，汝名為結；此疊華巾先實一條，第二第三，云何汝曹復名為結？』

阿難白佛言：『世尊！此寶疊華緝績成巾，雖本一體，如我思惟：如來一縮，得一結名；若百縮成，終名百結。何況此巾祇有六結，終不至七，亦不停五？云何如來祇許初時，第二第三不名為結？』

佛告阿難：『此寶華巾，汝知此巾元止一條。我六縮時，名有六結。汝審觀察，巾體是同，因結有異。於意云何？』

初縮結成，名為第一，如是乃至第六結生。吾今欲將第六結名，成第一不？』

『不也，世尊！六結若存，斯第六名，終非第一。縱我歷生盡其明辯，如何令是六結亂名？』

佛言：『如是，六結不同，循顧本因一巾所造，令其雜亂，終不得成。則汝六根亦復如是，畢竟同中生畢竟異。』

① 一解巾喻悟分三

② 一喻六解一亡分三

③ 一立喻

佛告阿難：『汝必嫌此六結不成，願樂一成復云何得？』

阿難言：『此結若存，是非鋒起。於中自生此結非彼，彼結非此。如來今日若總解除，結若不生則無彼此，尚不名

一，六云何成？』

④二合法

佛言：『六解一亡，亦復如是。由汝無始心性狂亂，知見妄發；發妄不息，勞見發塵。如勞目睛，則有狂華。於湛精明無因亂起，一切世間山河大地生死涅槃，皆即狂勞顛倒華相。』

⑤二喻解結由心分二

⑥一正顯由心

阿難言：『此勞同結，云何解除？』

如來以手將所結巾偏掣其左，問阿難言：『如是解不？』
『不也，世尊！』

旋復以手偏牽右邊，又問阿難：『如是解不？』

『不也，世尊！』

佛告阿難：『吾今以手左右各牽，竟不能解，汝設方便云何解成？』

阿難白佛言：『世尊！當於結心，解即分散。』

佛告阿難：『如是！如是！若欲除結，當於結心。』

⑥二指法興勸

阿難！我說佛法從因緣生，非取世間和合麤相。如來發明世出世法，知其本因隨所緣出，如是乃至恒沙界外一滴之雨亦知頭數，現前種種松直、棘曲、鵠白、烏玄皆了元由。是故，阿難！隨汝心中選擇六根，根結若除，塵相自滅；諸妄銷亡，不真何待！

⑦三喻解當次第

阿難！吾今問汝：此劫波羅巾六結現前，同時解縈，得同除不？」

『不也，世尊！是結本以次第縮生，今日當須次第而解。六結同體，結不同時。則結解時云何同除？』

佛言：『六根解除，亦復如是。此根初解，先得人空；空性圓明，成法解脫；解脫法已，俱空不生，是名菩薩從三摩地得無生忍。』

丑六 勅眾聖說餘門同證廣耳門而密授圓通本根^{分一}

㊦ 一 別顯修證^{分五}

寅一 阿難請世尊授圓通本根

㊦ 一 阿難請問圓根

阿難及諸大眾，蒙佛開示慧覺圓通，得無疑惑，一時合掌頂禮雙足而白佛言：『我等今日身心皎然，快得無礙。雖復悟知一六亡義，然猶未達圓通本根。世尊！我輩飄零，積劫孤露。何心何慮，預佛天倫，如失乳兒忽遇慈母。若復因此際會道成，所得密言，還同本悟，則與未聞無有差別。惟垂大悲惠我祕嚴！成就如來最後開示！』作是語已，五體投地，退藏密機，冀佛冥授。

寅二 世尊勅眾聖說最初悟門^{分三}

㊦ 二 如來垂詢聖眾

卯一 世尊普勅

爾時，世尊普告眾中諸大菩薩及諸漏盡大阿羅漢：『汝等

菩薩及阿羅漢，生我法中，得成無學。吾今問汝：『最初發心悟十八界，誰爲圓通？從何方便入三摩地？』

㊦ 二衆聖各說證門分五

卯二 衆聖各陳分一

辰一 衆聖略說餘門分二十四

㊧ 一觀六塵分六

㊨ 一陳那觀聲

巳一 音聲圓通

憍陳那五比丘即從座起，頂禮佛足。而白佛言：『我在鹿苑及於雞園，觀見如來最初成道，於佛音聲。悟明四諦。佛問比丘，我初稱解，如來印我名阿若多。妙音密圓，我於音聲得阿羅漢。佛問圓通，如我所證，音聲爲上。』

㊩ 一沙陀觀色

巳一 色因圓通

優波尼沙陀即從座起，頂禮佛足，而白佛言：『我亦觀佛最初成道，觀不淨相，生大厭離，悟諸色性，以從不淨、白骨、微塵歸於虛空；空色二無，成無學道。如來印我名尼沙陀。塵色既盡，妙色密圓，我從色相得阿羅漢。佛問圓通，如我所證，色因爲上。』

㊪ 二香嚴觀香

巳三 香嚴圓通

香嚴童子即從座起，頂禮佛足而白佛言：『我聞如來教我諦觀諸有爲相，我時辭佛，宴晦清齋，見諸比丘燒沈水香，香氣寂然來入鼻中。我觀此氣，非木非空。非煙非火，去無所著。來無所從，由是意銷，發明無漏，如來印我得香嚴號。塵氣倏滅，妙香密圓，我從香嚴得阿羅漢。佛問圓通，如我所證，香嚴爲上。』

①四藥王觀味

已四 味因圓通

藥王藥上二法王子並在會中五百梵天，即從座起，頂禮佛足而白佛言：『我無始劫，爲世良醫，口中嘗此娑婆世界草木金石，名數凡有十萬八千，如是悉知苦酢鹹淡甘辛等味，並諸和合俱生變異，是冷是熱，有毒無毒，悉能徧知。承事如來，了知味性，非空非有，非即身心，非離身心。分別味因，從是開悟，蒙佛如來印我昆季藥王藥上二菩薩名。今於會中爲法王子，因味覺明，位登菩薩。佛問圓通，如我所證，味因爲上。』

①五賢護觀觸

已五 觸因圓通

跋陀婆羅並其同伴十六闍士，即從座起，頂禮佛足而白佛言：『我等先於威音王佛聞法出家，於浴僧時隨例入室。

忽悟水因，既不洗塵，亦不洗體，中間安然，得無所有。宿習無忘，乃至今時從佛出家，令得無學。彼佛名我跋陀婆羅。妙觸宣明，成佛子住。佛問圓通，如我所證，觸因爲上。』

①六迦葉觀法

已六 法因圓通

摩訶迦葉及紫金光比丘尼等，即從座起，頂禮佛足，而白佛言：『我於往劫，於此界中有佛出世名日月燈，我得親近聞法修學。佛滅度後，供養舍利，然燈續明，以紫光金塗佛形像。自爾以來，世世生生，身常圓滿紫金光聚。此紫金光比丘尼等，即我眷屬，同時發心。我觀世間六塵變壞，唯以空寂修於滅盡，身心乃能度百千劫猶如彈指。我以空法成阿羅漢，世尊說我頭陀爲最。妙法開明，銷滅諸

漏。佛問圓通，如我所證，法因為上。』

⑧二觀五根分五

①一阿那律觀眼

已七 旋見圓通

阿那律陀即從座起，頂禮佛足而白佛言：『我初出家，常樂睡眠，如來訶我為畜生類。我聞佛訶，啼泣自責，七日不眠，失其雙目。世尊示我樂見照明金剛三昧，我不因眼觀見十方，精真洞然，如觀掌果，如來印我成阿羅漢。佛問圓通，如我所證，旋見循元，斯為第一。』

②二繼道觀鼻

已八 反息圓通

周利槃特迦即從座起，頂禮佛足而白佛言：『我闕誦持，無多聞性。最初值佛，聞法出家，憶持如來一句迦陀，於一百日，得前遺後，得後遺前。佛愍我愚，教我安居調出

入息。我時觀息，微細窮盡，生住異滅，諸行剎那，其心豁然，得大無礙，乃至漏盡成阿羅漢，住佛座下。印成無學。佛問圓通，如我所證，反息循空，斯為第一。』

③三牛呬觀舌

已九 旋知圓通

憍梵鉢提即從座起，頂禮佛足而白佛言：『我有口業，於過去劫輕弄沙門，世生有牛呬病。如來示我一味清淨心地法門，我得滅心入三摩地。觀味之知，非體非物，應念得超世間諸漏。內脫身心，外遺世界，遠離三有，如鳥出籠，離垢銷塵，法眼清淨，成阿羅漢，如來親印登無學道。佛問圓通，如我所證，還味旋知，斯為第一。』

④四餘習觀身

已十 純覺圓通

畢陵伽婆蹉即從座起，頂禮佛足而白佛言：『我初發心，

從佛入道，數聞如來說諸世間不可樂事。乞食城中，心思法門，不覺路中毒刺傷足，舉身疼痛。我念有知，知此深痛，雖覺覺痛，覺清淨心無痛痛覺。我又思惟：如是一身，寧有雙覺？攝念未久，身心忽空；三七日中，諸漏虛盡，成阿羅漢，得親印記，發明無學。佛問圓通，如我所證，純覺遺身，斯為第一。』

⑤ 五須菩提觀意

已十一 旋法圓通

須菩提即從座起，頂禮佛足而白佛言：『我曠劫來，心得無礙，自憶受生如恒河沙。初在母胎，即知空寂，如是乃至十方成空，亦令衆生證得空性。蒙如來發性覺真空，空性圓明，得阿羅漢，頓入如來寶明空海。同佛知見，印成無學；解脫性空，我為無上。佛問圓通，如我所證，諸相

入非，非所非盡，旋法歸無，斯為第一。』

⑥ 三觀六識分六

① 一舍利觀眼識

已十二 心見圓通

舍利弗即從座起，頂禮佛足而白佛言：『我曠劫來心見清淨，如是受生如恒河沙，世出世間種種變化，一見則通，獲無障礙。我於中路，逢迦葉波兄弟相逐，宣說因緣，悟心無際，從佛出家。見覺明圓，得大無畏，成阿羅漢，為佛長子。從佛口生，從法化生。佛問圓通，如我所證，心見發光，光極知見，斯為第一。』

② 二普賢觀耳識

已十三 心聞圓通

普賢菩薩即從座起，頂禮佛足而白佛言：『我已曾與恒沙如來為法王子，十方如來教其弟子菩薩根者，修普賢行，

從我立名。世尊！我用心聞分別衆生所有知見，若於他方恒沙界外，有一衆生心中發明普賢行者，我於爾時乘六牙象，分身百千，皆至其處，縱彼障深未得見我，我與其人暗中摩頂，擁護安慰，令其成就。佛問圓通，我說本因，心聞發明，分別自在，斯爲第一。』

①三覽喜觀鼻識

已十四 息觀圓通

孫陀羅難陀即從座起，頂禮佛足而白佛言：『我初出家，從佛入道，雖具戒律，於三摩地心常散動，未獲無漏。世尊教我及拘絺羅，觀鼻端白。我初諦觀經三七日，見鼻中氣出入如煙，身心內明，圓洞世界，徧成虛淨，猶如瑠璃。煙相漸銷，鼻息成白，心開漏盡。諸出入息化爲光明，照十方界，得阿羅漢，世尊記我當得菩提。佛問圓通，我

以銷息，息久發明，明圓滅漏，斯爲第一。』

①四滿慈觀舌識

已十五 辯才圓通

富樓那彌多羅尼子即從座起，頂禮佛足而白佛言：『我曠劫來辯才無礙，宣說苦空，深達實相；如是乃至恒沙如來祕密法門，我於衆中微妙開示，得無所畏。世尊知我有大辯才，以音聲輪教我發揚。我於佛前助佛轉輪，因師子吼成阿羅漢，世尊印我說法無上。佛問圓通，我以法音降伏魔怨，銷滅諸漏，斯爲第一。』

①五波離觀身識

已十六 持戒圓通

優婆離即從座起，頂禮佛足而白佛言：『我親隨佛踰城出家，親觀如來六年勤苦，親見如來降伏諸魔，制諸外道，解脫世間貪欲諸漏。承佛教誡，如是乃至三千威儀，八萬

微細性業遮業，悉皆清淨。身心寂滅，成阿羅漢。我是如來衆中綱紀，親印我心，持戒修身，衆推爲上。佛問圓通，我以執身，身得自在，次第執心，心得通達，然後身心一切通利，斯爲第一。」

①六目連觀意識

已十七 神力圓通

大目犍連即從座起，頂禮佛足而白佛言：『我初於路乞食，逢遇優樓頻螺、伽耶、那提、三迦葉波，宣說如來因緣深義。我頓發心，得大通達。如來惠我袈裟著身，鬚髮自落。我遊十方，得無罣礙，神通發明，推爲無上，成阿羅漢。寧唯世尊，十方如來嘆我神力，圓明清淨，自在無畏。佛問圓通，我以旋湛，心光發宣，如澄濁流，久成清瑩，斯爲第一。』

②四觀七大^{分七}

①一火頭觀火大

已十八 火大圓通

烏芻瑟摩於如來前，合掌頂禮佛之雙足而白佛言：『我常先憶久遠劫前，性多貪欲。有佛出世，名曰空王，說多姪人成猛火聚。教我徧觀百骸四肢諸冷煖氣，神光內凝，化多姪心成智慧火。從是諸佛皆呼召我名爲火頭。我以火光三昧力故，成阿羅漢。心發大願，諸佛成道，我爲力士，親伏魔怨。佛問圓通，我以諦觀身心煖觸無礙流通，諸漏既銷生大寶燄，登無上覺，斯爲第一。』

②二持地觀地大

已十九 地大圓通

持地菩薩即從座起，頂禮佛足而白佛言：『我念往昔普光如來出現於世，我爲比丘。常於一切要路津口，田地險隘

，有不如法。妨損車馬，我皆平填，或作橋梁，或負沙土。如是勤苦，經無量佛出現於世。或有衆生於闐闐處要人擎物，我先爲擎，至其所詣，放物即行，不取其直。毘舍浮佛現在世時，世多饑荒，我爲負人，無問遠近，唯取一錢。或有車牛被於泥溺，我有神力，爲其推輪，拔其苦惱。時國大王延佛設齋，我於爾時平地待佛。毘舍如來摩頂謂我：當平心地，則世界地一切皆平。我即心開，見身微塵與造世界所有微塵等無差別，微塵自性不相觸摩，乃至刀兵亦無所觸。我於法性悟無生忍，成阿羅漢，迴心今入菩薩位中，聞諸如來宣妙蓮華佛知見地，我先證明而爲上首。佛問圓通，我以諦觀身界二塵等無差別，本如來藏虛妄發塵，塵銷智圓成無上道，斯爲第一。』

㊦ 二月光觀水大

巳十 水大圓通

月光童子即從座起，頂禮佛足而白佛言：『我憶往昔恒河沙劫，有佛出世。名爲水天，教諸菩薩修習水觀。入三摩地。觀於身中水性無奪，初從涕唾，如是窮盡津液精血。大小便利，身中旋復水性一同；見水身中，與世界外浮幢王刹諸香水海。等無差別。我於是時，初成此觀，但見其水，未得無身。當爲比丘。室中安禪。我有弟子窺窗觀室，唯見清水徧在室中，了無所見。童稚無知，取一瓦礫投於水內，激水作聲，顧盼而去。我出定後，頓覺心痛，如舍利弗遭違害鬼。我自思惟：今我已得阿羅漢道，久離病緣，云何今日忽生心痛？將無退失？爾時，童子捷來我前，說如上事。我則告言：汝更見水，可即開門入此水中，

除去瓦礫。童子奉教。後入定時，還復見水，瓦礫宛然。開門除出。我後出定，身質如初。逢無量佛，如是至於山海自在通王如來，方得亡身；與十方界諸香水海，性合真空，無二無別。今於如來得童真名，預菩薩會。佛問圓通，我以水性一味流通，得無生忍，圓滿菩提，斯爲第一。

』

①四瑠璃光觀風大

巳二 風大圓通

琉璃光法王子即從座起，頂禮佛足而白佛言：『我憶往昔經恒沙劫，有佛出世名無量聲，開示菩薩本覺妙明，觀此世界及衆生身，皆是妄緣風力所轉。我於爾時，觀界安立，觀世動時，觀身動止，觀心動念，諸動無二，等無差別。我時覺了此群動性，來無所從，去無所至；十方微塵顛

倒衆生，同一虛妄。如是乃至三千大千一世界內所有衆生，如一器中貯百蚊蚋啾啾亂鳴，於方寸中鼓發狂鬧。逢佛未幾，得無生忍；爾時心開，乃見東方不動佛國，爲法王子，事十方佛。身心發光，洞徹無礙。佛問圓通，我以觀察風力無依，悟菩提心入三摩地，合十方佛傳一妙心，斯爲第一。』

①五虛空藏觀空大

巳三 空大圓通

虛空藏菩薩即從座起，頂禮佛足而白佛言：『我與如來，定光佛所得無邊身。爾時，手執四大寶珠，照明十方微塵佛刹化成虛空。又於自心現大圓鏡，內放十種微妙寶光。流灌十方盡虛空際，諸幢王刹來入鏡內，涉入我身。身同虛空不相妨礙，身能善入微塵國土，廣行佛事，得大隨順

。此大神力，由我諦觀四大無依，妄想生滅，虛空無二，佛國本同。於同發明，得無生忍。佛問圓通，我以觀察虛空無邊，入三摩地，妙力圓明，斯為第一。』

④六彌勒觀識大

巳三 唯識圓通

彌勒菩薩即從座起，頂禮佛足而白佛言：『我憶往昔經微塵劫，有佛出世，名日月燈明。我從彼佛而得出家，心重世名，好遊族姓。爾時，世尊教我修習唯心識定，入三摩地。歷劫以來，以此三昧事恒沙佛，求世名心歇滅無有。至然燈佛出現於世，我乃得成無上妙圓識心三昧；乃至盡空如來國土，淨穢有無，皆是我心變化所現。世尊！我了如是唯心識故，識性流出無量如來。今得授記，次補佛處。佛問圓通，我以諦觀十方唯識，識心圓明，入圓成實，

遠離依他及徧計執，得無生忍，斯為第一。』

④七勢至觀根大

巳四 念佛圓通

大勢至法王子與其同倫五十二菩薩，即從座起，頂禮佛足而白佛言：『我憶往昔恒河沙劫，有佛出世名無量光。十二如來相繼一劫，其最後佛名超日月光。彼佛教我念佛三昧：譬如有人，一專為憶，一人專忘，如是二人，若逢不逢或見非見。二人相憶，二憶念深，如是乃至從生至生，同於形影，不相乖異。十方如來，憐念眾生，如母憶子。若子逃逝，雖憶何為？子若憶母，如母憶時，母子歷生不相違遠。若眾生心憶佛念佛，現前當來必定見佛，去佛不遠。不假方便，自得心開。如染香人，身有香氣，此則名曰香光莊嚴。我本因地，以念佛心入無生忍。今於此界，

攝念佛人歸於淨土。佛問圓通，我無選擇，都攝六根。淨念相繼，得三摩地，斯為第一。』

大佛頂首楞嚴經 卷五